



Tuhaqtitaujukhaq

Tuhaqtitauhainnaqtuqhaq

Kanadaup Kavamanga, Nunavut Kavamanga, Nunavut Tunngavitkullu tikitaa kingulliqaq angiruti nanminiqhuurnirmun Nunavunmik

Januali 18, 2024

Iqaluit, Nunavut

Kanadaup Angajuqqaarjuangata Havagvia

Talvanga Nunavutim piliurnanin nunagijaulirnirun tikinnuaqhugu 25nik ukiunik qaangiqtunik, Kanadaup Kavamanga, Nunavut Kavamanga, Nunavut Tunngavitkullu havaqatigiittiaqhimajun pipkarutikkut turaangajuq piangaijarnirun, inuuqatigiingnirun, pitquhikkullu inuuhirittiarutingnun Nunavunmik talvuuna inmikkut-ihumaliurutikkut.

Ublumi, Angajuqqaarjuaq, Justin Trudeau, Minista Ukiuqtaqtumi Kavamaliqidjutainni, Dan Vandal, Hivuliqti Nunavut, P.J. Akeeagok, unalu Angijuqqaq Nunavut Tunngavitkunni, Aluki Kotierk, atiliuqtaat Nunavut Nunatigut Piquitigullu Nanminiqhurnikkut Angiruti – angijuq naunaitkuti auladjutaanin nunaptingnin tautuktaujuq Inuinnaait hivuliqtiinnin, atanngujarjuarnin, nunallaamiutanillu.

Una puiguqnaittuq angiruti angitqijaujuq nunakkut nuutiruti Kanadaup auladjutaani. Angirutiqarnikkut, Nunavut inungijailu tadjja piliuqtauliqtun ihumaliurutinik qanuqtun inungnun nunait, imautait, nunguttaaqtullu piquitit atuqtaudjutikhainnik nunami, pilugillu ikajuutit nakuujunin aularaangiinaqtaaqtunillu pigtuni pivallialiurnirnin. Nanminiqhuurniq piliurniaqtuq Ukiuqtaqtumin-hivulliqtaujumin havaakhanik, uuktuqvikhanik, maniliurutikhanik, piangaiqjuumirutikhaniklu Nunavunmun inugijainnullu, tavungaalungmun.

Una angiruti tautuktitaa ikajuqtaalu hivulliutiujumajait Nunavut. Piqarhuni atauttikkut havagumanikkut tautukhimanirmun inmikkut-ihumaliurutikkut, havakqatigihimmaaqtavun paannarijavun ukunani tikittukhanik pingahuni ukiuni atuqtipkailirnirun nutirutikkut munaridjutit, taapkuat iniqtauniaqtun talvuuna April 1, 2027.

Nanminiqhuurniq ihariagijaujuq pidjutit kavamaliqinikkut piangaijarnikkullu pivalliadjutaani Nunavut uvanilu atauttikkut apqutaujumi mamitiharnirun. Havaqtigihimmaarniaqtugun hakugikhainirmun Nunavunmik uvani piangaijarnirun hivunikhaanun, hakugikharlugu una Inuit-Kavamat pitjutiqatigiit, pipkailunilu

nakuutqijaujunik, qaumatqijaujumik hivunikhamik tamainnun uqarhimajaa Nunavut aihimavigijaa.

Uqautiit

“Una puigurnaittuq ubluq Nunavunmun Kanadamullu. Pidjataujuq hakugiktunin, havaqatigiigutinin piliuqhimajavun nunaptikni uvanilu Nunavut Tunngavitkunni tunihijaami havaakhanik, maniliruutikhanik, ukuningalu aallanguqtirutaautaaqtunik uukturvikhanik Nunavunmiunnun. Pihuutigiplugu una atauttikkut apquti mamiharnirnun, angitqijaujut ihumaliurutikhat hulaqutikkut Nunavunmun piliuqtauniaqtuq Nunavunmi, inugijainnin, ukununga inugijainnun.”

— The Rt. Nanngarijaujuq Justin Trudeau, Angajuqqaajuanga Kanadami

"Namminiqsurniq, unaluunniit nanminiqhuurniq, atauhiujuq atugakhaq talvunga tautukhimanirmun inmikkut-pidjutikhakkut Nunavut. Atiliurutaani uumani angirutimi, aggitittaaqtaqqut ihumaliurutikkut ukunani nunaptikni imaptingnilu Nunavunmun. Tukilik uvagut, inuit piqpiarutikaqtugun nunaptikni, munaridjutiginialiqtavun nunaptikni piqutivun. Taimaa pihimajuq akuniraalungmin hivuliqtivun pidjutaani hapkunani havagutini, ublumi atiliuruta uumani nanumiqhuurnikkut angirutimi pilluarutiujuq ukununga inulrammiinnun Nunavunmiunun tamaani nunaptikni."

— The Hon. P.J. Akeeagok, Nunavutim Hivuliqtia

"Nunavut, Inuktut, tukilik 'nunakput'. Piliurutaani, talvuuna Nunavunmi Angirutimi, anginiqaqtuq hivumuudjuti Inuit pihimajaami nakuujunik munaridjutinik qanuriliurutaanun nunagijaptiknun. 25ni ukiuni talvunga, Nunavut Tunngavitkut havakpiaqpakhimajuq pitjutaanik taaffumani turaangadjutimi, ublumilu aliahuutigijavut una anginiqaqtuq naunaitkuti talvunga tikitirumadjutimun. Niriuktugun havaqatigilugin Kanadaup Kavamanga unalu Nunavut Kavamanga atuqtipkailirnirmun una angijuq angiruti, ilaujullu Havaktuqliqijikkut Pivallianirmun Parnaquti, aulapkaihimmaarlugulu auladjutikput talvunga inmikkut-ihumaliurutikkut Nunavunmi Inungnun."

—Aluki Kotierk, Angijuqqaq, Nunavut Tunngavikkut

“Atiliurnia uumani Nunavunmi Nanminiqhuurnikkut Angirutimi naunaijaqtaa nutaaq pidjutikhaq Nunavunmun, talvani ihumaliurutikhat inniaqtun Nunavunmiunin, taapkuat pitquhiit, piangaijautait, piniaqhimajaillu atadjutilgit nunanun talvaniittunun. Una piugurnaittuq angiruti tautuktiaa ikajuqtaalu ihariagijainnik hivulliutijumajainnik pipkainikkullu piangaijarutikhat aallallu ikajurutikhat pitqutini pivallianirni nunami atuqatigiiktaujuq Inuinnun tamainnullu Nunavunmiunnun.

— Nanngarijaujuq Dan Vandal, Minista Ukiuqtaqtumi Kavamaliqidjutainni

Kangiqhidjutit

- Hivumuutaa Nunavunmi nanminiqhuurniq piujuq kavamatuqatkunnin hivulliutiuhimajuq talvunga piliurningani nunaptiknik 1999mi ataani uvani *Nunavut Maligami* akunnganiittuqlu hivumuutinikkut mamiharnirnun uvanilu inmikkut-ihumaliurutikkut.
- 2019mi, Kanadaup Kavamanga, Nunavut Kavamanga, unalu Nunavut Tunngavikkut pijun anginiqaqtumik pidjutimik nanminiqhuurnirmun Nunavunmi uvani atiliurutaani uumani Angirutimi-Hivunikhaliurutinik (AIP). Una AIP ilijaa

pijdutikha aivadjutikhanun uumani kingulliqaami angirutimi taamna atiliuqtaujuq ublumi.

- Nanminiqhaqhuurniq hakugikharniaqtait avikturhimanirni kavamaliqidjutit kiudjutiqtarutillu, tunilugu Nunavut angitqijaujunik amiridjutinik ihumaliurutinun nunani piqutinilu, angmarlugulu ukkuq nutaanun maniliurutikhanun piangaijarnikkullu pivalladjutikhanun uukturutikhanun nunaptikni.
- Ublumimun, Nunavut kingulliqaangujuq ukiuqtaqtuq piqangittukkut amiridjutinik nanminirijainni nunainni piqutainnilu. Nanminiqhuurniq iniqhimajuq Yukonmi 2003mi uvanilu Nunatsiami 2014mi.
- Ublumi unniudjutaani tuniqjuq nunallaani [Kanadaup Ukiuqtaqtumi Tunnunganilu Atugakhami Hanaqidjutikhaq](#). Aullaqtiqtuq 2019mi pivalliahimajuqlu Nunaaqqaqtuni havaktiinni ukunanilu siksiujuni ukiuqtaqtuni avikturhimaniiinnilu kavamagijaujuni, hanaqidjutikhaq piujuq hivutuniqaqtumun tautuguti Ukiuqtaqtumun Tunnunganilu tautungnaqtuq hiuvliutiujumajainnik ihumagidjutainnilu Ukiuqtaqtumi tunnunganilu inugijainnun. Tikiutijumajaulluarutaa uumani atauttikut-pivallianirmi hanaqidjutimi imaatun iniqtiqlugin iniqhimaittun havaktakhat, ilaujullu namnimiqhuunikkut ukunani avikturhimanirni-ittutun atanniqtuidjutit ukununga ukiuqtaqtumi kavamagijaujunun.

Pidjutilgit Hunat

- [Nunavunmi Nunait Pigutailu Nanminiqhuunirmi Angiruti](#)

Ilaudjutilgit Atadjutit

- [Nunavunmi Nanminiqhuurniq](#)
- [Nanminiqhuurniq \(Nunavut Kavamanga\)](#)
- [Nunavut Tunngavik Incorporated](#)
- [Nanminiqhuunikkut Tutquumaviit \(Nunavut Tunngavik Incorporated\)](#)

– 30 –

PMO Tuhaqtipkainikkut Havagvia: media@pmo-cpm.gc.ca

Una titiraq hailihimajuqlu uvani <https://pm.gc.ca>

Michele LeTourneau
Tuhaqtipkaidjutikhanut Titiraqtia
Havagvia Hivuliqtup P.J Akeeagok
Nunavut Kavamanga
867-222-4306
MLeTourneau6@gov.nu.ca

Kevin Kablutsiak
Aulapkaiji Tuhaqtipkainirnut
Nunavut Tunngavik Incorporated
media@tunngavik.com

Canada